



Lucia e Gion Battista Duff (Runé) èn gugent en la natira.




Giusep Deplazes ha plaschair che sia biadia Laura è vegnida cun el en Runcahez.

Vita da mises – vita da mai murir

En ils mises è sa furmada ina nova cultura da vacanzas

■ (anr/vi) **Ils Talians van l'avust sper la mar a far vacanzas. Blers Turitgais passentan il temp liber sin ina bartga sin il lai. E tge fan ils Grischuns? Tgi che ha la chaschun, fa vacanzas si mises.** Igl è las pli sanadaivlas e bunmargadas vacanzas ch'i dat. Empè da pajar millis da francs per sgular en terras estras e braslentar la pel sin spalgias plainas, pon ins giudair in vent frestgin si mises. L'anr ha vult retschertgar in zic la cultura da vacanzas en



sinviadi

Guido Maissen en il Run

Il Run, entadim la Val, ha var diesch tegias. Là passenta **Guido Maissen** tut ses temp liber. Sia tegia è vegnida construida il 1656. «Igl era la mendra baracca», sa regorda Maissen dal temp cura che ses bab ha cumprà la tegia. En il fratemp è la baracca daventada in «bijou». L'anteriur scrinari ha investì tschients e tschients d'uras da lavur en sia tegia. Mintga detagl e rugalà cun charezza. La pitga funtauna ha in pitschen tetg da schlondas. Avant tegia creschan rosas ed in mailer. Igl è ina pitschna villa alpina che ha tuttina salvà il caracter da mises. En quest ambient sa senta Maissen fitg bain.

Tat e tatta cun biadia a Runcahez

In toc plinenora sa chattan las tegias da

Runcahez. Là passentan **Emma e Giusep Deplazes** intgins dis. Laura, la biadia da dus onns, fa curtarella a tat e tatta. Dapi 30 onns vegnan ils Deplazes a Runcahez. «Nus eran adina ina entira societad», raquinta Emma Deplazes. Ils agens uffants ed ils uffants da la sora passentan ensem las vacanzas. Uss tutga il mises ad in nevs, ma ils Deplazes dastgan anc adina vegnir.

«Ins po sa revegnir fitg bain en in mises», di Giusep Deplazes: «Nus essan era stads duas giadas a Rimini. Quai na di betg uschè bler a mi.»

Ils Duffs en Runé

En il Runé èn gist dus mises occupads. **Gion Battista e Lucia Duff** èn vegnids per dus dis. Fin avant dus onns han els anc sezs fatg fain si mises. Uss vegnan els per giudair. Avant otg onns han els renovà la tegia – cunzunt pervi dils uffants



La romantica da mises vala era per ils hislis.

che han era già pops. «Lezs vegnan lura schon gugent en mises», di Lucia Duff ch'è sezza era adina leda, sch'ella po «da la Val en». In zic donn saja ch'ìls bulieus èn quest onn anc betg uschè lunsch. Intgins mellens cuchejian già ord il teratsch, ma per far buna raccolta na tanschi anc betg.

In Lumnezian en Val Sumvitg

Intginas tegias plinervi ha **Toni Derungs** sia «residenza». Avant paucs onns ha el cumprà la tegia. Cun sia dunna fa el turas sin la pizza ed en las alps. L'atun va el a chatscha. Sin la dumonda, sche quai na haja betg dà problems ch'in «ester» saja tuttenina vegnì a chatscha en quest territori, respunda Derungs: Ins haja l'entschatta forsà betg vesì uschè gugent ch'el, sco Lumnezian e sesent a Domat, haja cumprà la tegia. Ma uss na saja quai nagin problem. El haja era vivì blers onns en la Cadi ed enconuschia la regiun bunamain meglier che la Lumnezia nua ch'el è creschì si.

Il pur en l'Acla Mulin

Da quel temp vegn sa chapescha era fatg fain. **Emanuel Giger** ha anc da raschlar las ultimas panuglias en l'Acla Mulin. Ses quinà è gist sin visita e gida. I n'è betg il mises dals Gigers, ma il giuven pur fa il fain dapi quatter onns. Era en Runé e Run-Plaun va el a fanar. La raccolta maina el cun il chargiafain ora Surrein. Cun il fain da Run-Plaun èsi pli difficil. Là ston ins ir cun il transporter sur in pitschen piogn dal Rain da Val.


Dalila Giger, la dunna dal pur, na sa lamenta betg da lavurar en ils mises nua ch'igl è gea bler pli stentus ch'en la plaina da Surrein. Per ella èsi era variaziun ed ella di: «En qua èsi pli frestg, i ha dapertert plantas e savens in zic umbriva.»



Guido Maissen ha fatg ord ses mises in pitschen paradìs. Tut è rugalà cun blera pazienza e charezza.



La pitga funtauna da Guido Maissen ha perfin in tetg da schlondas.



Toni Derungs (Runé) renovescha sia tegia ch'el ha cumprà avant paucs onns.



Emanuel Giger (sanester) fa il fain da plirs mises. El ha gist visita da ses quinà Bladimir Cerda (dretg).